

太上玄門早課

香讚

祥煙馥鬱 瑞氣氤氳 羅天海岳遍遙聞
列聖盡來臨 賜福乾坤 大地獲清寧

大聖 香雲達信大天尊 三稱

祥煙初起 法界氤氳 羅天海岳界香騰

到處覆祥雲 達信通誠 賜福與遐齡

常清 常靜無上大天尊 三稱

沉檀鑪爇 瑞氣氤氳 結成寶篆透天門

上帝悉遙聞 鶴駕來臨 證此勝功勛

皈命 香雲普遍大天尊 三稱

香 白

香乃玉華散影 九氣含煙 香焚彌羅
逕衝九天 侍香金童 傳言玉女 為 臣奏啟
上聞帝前 悉仗真香 普同供養
皈命 香通三境大天尊

三寶白

黃金滿月相 三界獨稱尊 降伏一切魔
諸天皆欽仰 壇場清靜 法界光明
祥光遍佈於虛空 瑞氣登臨於寶座
茲當登壇 演淨請聖之初 先須皈敬三寶
「大眾虔誠 讚揚聖號」

三寶讚『香花』

稽首皈依道 道在玉京山 玉京山說法

說法利人天 皈依 大羅元始大天尊

稽首皈依經 經寶演靈文 靈文書鳳篆

鳳篆廣宣揚 皈依 玉宸靈寶大天尊

稽首皈依師 師心似水清 水清秋月現

月現廣無邊 皈依 混元道德大天尊

三寶慈悲垂加護（三稱）

華池偈

一滴清涼水 心花五葉開

九龍吐瑞靄 隨處洒塵埃

請 水

功：香花迎◎◎ 眾：香花請

功：皈命一心 眾：奉 請

功：三十三天紫金殿上 碧玉池中

掌握混元清水大聖 白帝茫泓

「無窮靈源真君」 唯願◎◎

不違本誓 憐憫凡情 降赴壇場 請伸法乳

水 讚

天一生水 地六合成 五行德冠沛流形

洞澈玉壺冰 激濁揚清 洒淨天地人

皈命 常清常靜大天尊

十小咒

(一) 淨心神咒

太上臺星 應變無停 驅邪縛魅 保命護身
智慧明淨 心神安寧 三魂永久 魄無喪傾

(二) 淨口神咒

丹朱口神 吐穢除氛 舌神正倫 通命養神
羅千齒神 却邪衛真 喉神虎賁 炁神引津
心神丹元 令我通真 思神煉液 道炁長存

(三) 淨身神咒

靈寶天尊 安慰身形 弟子魂魄 五臟玄冥
青龍白虎 隊仗紛紜 朱雀玄武 侍衛我真

(四) 安土地神咒

元始安鎮	普告萬靈	嶽瀆真官	土地祇靈
左社右稷	不得妄驚	回向正道	內外澄清
個安方位	備守壇庭	太上有命	搜捕邪精
護法神王	保衛誦經	皈依大道	元亨利貞
凶穢消散	道炁常存		

(五) 淨天地解穢咒

天地自然	穢氣分散	洞中玄虛	晃朗太元
八方威神	使我自然	靈寶符命	普告九天
乾羅答那	洞罡太玄	斬妖縛邪	度鬼萬千
中山神咒	元始玉文	持誦一遍	却病延年
按行五嶽	八海知聞	魔王束首	侍衛我軒

凶穢消散
道炁常存

(六) 祝香咒

道由心學
心假香傳
香爇玉爐
心存帝前
真靈下盼
仙佩臨軒
弟子關告
逕達九天

(七) 金光神咒

天地玄宗
萬炁本根
廣修億劫
證吾神通
三界內外
惟道獨尊
體有金光
覆映吾身
視之不見
聽之不聞
包羅天地
養育群生
誦持萬遍
身有光明
三界侍衛
五帝司迎
萬神朝禮
役使雷霆
鬼妖喪膽
精怪亡形
內有霹靂
雷神隱名
洞慧交徹
五炁騰騰
金光速現
覆護真形

(八) 五星神咒

五星烈照	煥明五方	水星却災	木德致昌
熒惑消禍	太白辟兵	鎮星四據	家國利亨
名刊玉簡	字錄帝房	乘飆散景	飛騰太空
出入冥無	遊宴十方	五雲浮蓋	招神攝風
役使萬靈	上衛仙翁		

(九) 攝魔神咒

乾坤一炁	育我者七	丹元寂養	妙在勤息
善觀太和	洞察出入	化賊為良	刺邪如戟
鑒耀金庭	常杜五逆	運閉旁關	洒掃淨室
塵起於土	土安神逸	煙生於火	火降氛滅

金空有聲 聲不亂擊 木堅則榮 守榮財實
水澄則清 貴清不溢 五政既持 利往從吉
二儀在戶 循環赫奕 處暗愈光 交曲使真
綱紀吾身 晨昏怛惕 迴度靈田 精華羅畢
頃刻敷威 群魔自息 皎皎無窮 用之不竭
無強無昧 無妄無弱 以太光明 圓通莫測
能斬飛神 能絕六疫 以玉為章 玉無瑕跡
以金為章 金焚不洩 長誦吾章 逍遙太極

(十) 開經玄蒞咒

雲篆太虛 浩劫之初 乍遐乍邇 或沉或浮
五方徘徊 一丈之餘 天真皇人 按筆乃書
以演洞章 次書靈符 元始下降 真文誕敷

昭昭其有 冥冥其無 沉疴能自痊
塵勞溺可扶 幽冥將有賴 由是昇仙都

太上老君說常清靜妙經（跪誦）

老君曰：大道無形 生育天地 大道無情

運行日月 大道無名 長養萬物 吾不知其名

強名曰道 夫 道者 有清有濁 有動有靜

天清地濁 天動地靜 男清女濁 男動女靜

降本流末 而生萬物 清者濁之源

動者靜之基 人能常清靜 天地悉皆歸

夫 人神好清 而心擾之 人心好靜 而慾牽之

常能遣其慾 而心自靜 澄其心 而神自清

自然六慾不生 三毒消滅 所以不能者

為心未澄 慾未遣也 能遣之者 內觀其心

心無其心	外觀其形	形無其形	遠觀其物
物無其物	三者既悟	唯見於空	觀空亦空
空無所空	所空既無	無無亦無	無無既無
湛然常寂	寂無所寂	慾豈能生	慾既不生
即是真靜	真常應物	真常得性	常應常靜
常清靜矣	如此清靜	漸入真道	既入真道
名為得道	雖名得道	實無所得	為化眾生
名為得道	能悟之者	可傳聖道	
老君曰	上士無爭	下士好爭	上德不德
下德執德	執著之者	不名道德	眾生所以
不得真道者	為有妄心	既有妄心	即驚其神

既驚其神 即著萬物 既著萬物 即生貪求
既生貪求 即是煩惱 煩惱妄想 憂苦身心
便遭濁辱 流浪生死 常沉苦海 永失真道
真常之道 悟者自得 得悟道者 常清靜矣

仙人葛翁曰：吾得真道 曾誦此經萬遍

此經是天人所習 不傳下士 吾昔受之于

東華帝君 東華帝君受之于金闕帝君

金闕帝君受之于西王母 西王母乃口口相傳

不記文字 吾今于世 書而錄之 上士悟之

昇為天官 中士修之 南宮列仙 下士得之

在世長年 游行三界 昇入金門

左玄真人曰：學道之士 持誦此經者

即得十天善神 擁護其身 然後玉符保神

金液煉形 形神俱妙 與道合真

正乙真人曰：人家有此經 悟解之者

災障不干 眾聖護門 神昇上界 朝拜高真

功滿德就 相感帝君 誦持不退 身騰紫雲

太上老君說常清靜經 竟

太上洞玄靈寶昇玄消災護命妙經

稽首皈依眾妙真 至心恭敬二玄真

今運一心心所議 粗識此經經所因

空色色空無有性 有無無有色空均

慧風出自天尊力 掃除心界不遺塵

唯願神光常擁護 證盟今日守心人

今日守心何所證 不失凡身得道身

爾時

元始天尊 在七寶林中 五明宮內

與無極聖眾 俱放無極光明 照無極世界

觀無極眾生 受無極苦惱 宛轉世間

輪迴生死 漂浪愛河 流吹欲海 沉滯聲色

迷惑有無 無空有空 無色有色 無無有無

有有無有 終始暗昧 不能自明 畢竟迷惑

天尊告曰 汝等眾生 從不有中有 不無中無

不色中色 不空中空 非有為有 非無為無

非色為色 非空為空 空即是空 空無定空

色即是色 色無定色 即色是空 即空是色

若能知空不空 知色不色 名為照了

始達妙音 識無空法 洞觀無礙 入眾妙門

自然解悟 離諸疑網 不著空見 清靜六根

斷諸邪障 我即為汝 說是妙經 名曰護命

濟度眾生 傳教世間 流通讀誦 即有

飛天神王 破邪金剛 護法靈童 教苦真人

金精猛獸 各百億萬眾 俱侍衛是經

隨所擁護 悍厄扶衰度一切眾生 離諸染著
爾時 天尊即說偈曰
視不見我 聽不得聞 離種種邊 名為妙道
太上洞玄靈寶昇玄消災護命妙經 竟

太上靈寶天尊說禳災度厄真經

天尊在禪黎國土 與大道真仙 萬萬億千人
諸天尊及諸天龍鬼神 盡來集會 受我約束
世間若有善男子 善女人 或有年災月厄
游城赤鼠之厄 天羅地網之厄
命窮算盡之厄 疾病纏綿之厄
落水波濤之厄 虎狼虺蛇之厄

水火盜賊之厄 刀兵生產之厄

山林樹木社稷之厄 土石橋樑之厄

毒藥咒詛之厄 唯願今對玉皇天尊

大道真聖 懺悔解禳 度脫身中災厄

一一解散 勿為留難 敕諸天神王

並降聖力道力 承此經力恩力 護衛弟子

授持念誦此經已後 解禳陽九百六之災

三衰八難九橫五苦之厄 如求如願

所履平安 出入行藏 常蒙吉慶 所為利益

所欲遂心 於是眾等 聞說此經 皆大歡喜

信受奉行

太上靈寶天尊說禳災度厄真經 竟

無上玉皇心印妙經

上藥三品	神與氣精	恍恍惚惚	杳杳冥冥
存無守有	頃刻而成	迴風混合	百日功靈
默朝上帝	一紀飛昇	知者易悟	昧者難行
履踐天光	呼吸育清	出玄入牝	若亡若存
綿綿不絕	固蒂深根	人各有精	精合其神
神合其炁	炁合其真	不得其真	皆是強名
神能入石	神能飛形	入水不溺	入火不焚
神依形生	精依氣盈	不凋不殘	松柏青青
三品一理	妙不可聽	其聚則有	其散則零

七竅相通 竅竅光明 聖日聖月 照耀金庭

一得永得 自然身輕 太和充溢 骨散寒瓊

得丹則靈 不得則傾 丹在身中 非白非青

誦持萬遍 妙理自明

無上玉皇心印妙經 竟

玉清寶誥

志心皈命禮

三界之上 梵炁彌羅 上極無上 天中之天
鬱羅蕭臺 玉山上京 眇眇金闕 森羅淨泓
玄元始炁 混沌之先 寶珠之中 玄之又玄
開明三景 化生諸天 億萬天真 無鞅聖眾
旋斗歷箕 回度五常 巍巍大範 萬道之宗
大羅玉清 虛無自然 至真妙道 元始天尊

上清寶誥

志心皈命禮

居上清境 號靈寶君 祖劫化生
九萬九千餘梵炁 赤書煥發 六百六十八真文
因混沌赤文而開九霄 紀元洞玉歷而分五劫

天經地緯 巍乎造化之宗 樞陰機陽
卓爾雷霆之祖 大悲大願 大聖大慈
玉宸道君 靈寶天尊

太 清 寶 誥

志心皈命禮

隨方設教 歷劫度人 為皇者師 帝者師

王者師 假名易號 立天之道 地之道

人之道 隱聖顯凡 總千二百之官君

包萬億重之梵炁 化行今古 著道德凡五千言

主握陰陽 命雷霆用九五數 大悲大願

大聖大慈 太上老君 道德天尊

玉 帝 寶 誥 志心皈命禮

太上彌羅無上天 妙有玄真境 眇眇紫金闕
太微玉清宮 無極無上聖 廓落發光明
寂寂浩無宗 玄範總十方 湛然真常道
恢漠大神通 玉皇大天尊 玄穹高上帝

天皇寶誥 志心皈命禮

紫微宸極 勾陳天宮 九光寶苑之中
五炁玄都之上 體元皇而佐司玄化 總兩極而
共理三才 主持兵革之權衡 廣推大德 統御
星辰之纏次 毋失常經 上象巍峨 真元恢漠
大悲大願 大聖大慈 勾陳上宮 天皇大帝

星主寶誥 志心皈命禮

大羅天闕 紫微星宮 尊居北極之高

位正中天之上 法號金輪熾盛 道稱玉斗玄尊

璇璣玉衡齊七政 總天經地緯 日月星宿

約四時 行黃道紫垣 萬象宗師 諸天統御

大悲大願 大聖大慈 萬興教主 無極元皇

中天紫微 北極大帝

南 極 寶 誥

志心皈命禮

高上神霄府 凝神煥照宮 會元始祖炁以分真

應妙道虛無而開化 位乎九霄之上 統御諸天

總乎十極之中 宰制萬化 宣金符而垂光濟苦

施惠澤而覆育兆民 恩溥乾元 仁敷浩劫

大悲大願 大聖大慈 玉清真主

南極長生大帝 統天元聖天尊

雷祖寶誥

志心皈命禮

九天應元府 無上玉清王 化形而滿十方

談道而趺九鳳 三十六天之上 閱寶笈

考瓊書 千五百劫之先 位正真 權大化

手舉金光如意 宣說玉樞寶經 不順化作微塵

發號疾如風火 以清靜心而弘大願 以智慧力

而伏諸魔 總司五雷 運心三界 群生父萬靈師 大聖大慈 至皇至

道

九天應元雷聲普化天尊

后土寶誥

志心皈命禮

九華玉闕 七寶皇房 承天稟命之期
主陰執陽之柄 道推尊而含弘廣大 德數蓄于
柔順利貞 效法昊天 根本育坤元之美
流行品物 生成施母道之仁 岳瀆是依
山川咸仗 大悲大願 大聖大慈 承天效法
后土皇地祇

三 啟 頌

三清聖號廣宣揚 一句能消萬劫殃
七寶林中朝上帝 眾等志心禮虛皇

禮 御

皈命 三清三境 三寶天尊
皈命 玉皇天尊 后土元君

皈命 普化天尊 三官大帝

皈命 (宮內主神)

皈命 一切神祇 (宮名眾神)

皈命 先天啟教 歷代宗師

皈命 侍宸捧御 無鞅聖眾

大讚 志心朝禮

玉皇大天尊 為三界師混元祖 妙相冠諸天

慈光燭三界 大神通 光明藏大丈夫

開化人天眾 流煥轉法輪 現希有相利群生

正一指迷途 讚揚無窮盡 降吉祥

消災障增福壽

皈依無上至真三寶 (三叩稱)

功：道德天尊

眾：道德天尊

功：玉皇天尊

眾：玉皇天尊

功：道場列聖

眾：道場列聖

功：普 同

眾：供 養

功宣意偈

萬象巍巍一洞天

瑤池宮裡會群仙

樓台光照三清界

花卉香浮五色煙

功：向來奉為

宮啟建太上覃恩

請福迎禧

告（朔、望）

誦經禮懺

永日道場

以今登壇

演淨請聖之初

具有意文

謹當宣讀

伏願聖慈

『俯垂洞鑒』

宣讀意文

監壇誥

王天君誥

志心皈命禮

先天主將 一炁神君 都天糾罰大靈官

三界無私猛烈將 金睛朱髮 號三五火車雷公

鳳嘴銀牙 統百萬貔貅神將 飛騰雲霧

號令雷霆 降雨開晴 驅邪治病 觀過錯於

一十二年 受命玉帝 積功勳於百千萬劫

誓佐祖師 至剛至勇 濟死濟生 方方闡教

處處開壇 豁落猛吏 三五火車大靈官

王天君 太乙雷聲 應化天尊

『

馬天君誥

志心皈依命禮

斗口魁神 璇璣上將 三頭磊落

應三臺照耀之形 九日輝煌 印九斗光華之象

秉西靈之正氣 足踏白蛇 戴南極之威靈

背飛單鳥 寄化沖天風火院 專司北極號天罡

寶劍珠鈴 揮霍妖魔皆絕滅 帝鐘法印

行持神鬼悉皈依 隨梓童而主文衡

輔紫薇而司祿命 大悲大願 大聖大威

高上神霄 玉清真皇 混天法主元帥

玉府司命真君 光明華藏 寂道真皇

南極火犀大仙 北帝都天罡 橫天威烈神王

攝魔雷令大臣 掌管雷霆都司

考召命捉大將軍 掌管風雲雷雨電

糾察三界邪魔 天下都提轄 正一靈官

馬天君 雷音 『不動天尊』

監壇讚（一）

監壇天將 慈悲化身 擁護道法最宏深

寶杵鎮魔軍 功德難量 祈禱赴凡塵

（二）

先天主將 處處闡揚 身披金甲顯威光

應化法難量 護國忠良 一炁煉純陽

皈命 監壇護法大天尊

禮 願

弟子眾等 志心發願

一願乾坤明素

二願氣象清圓

三願主躬康泰

四願民族和睦

五願天垂甘露

六願地發祥煙

七願四時順序

八願萬物生全

九願家多孝悌

十願國富才賢

再願世界和平

更願正道興行

法眾虔誠

同登道岸

王帥誥

仰啟神威豁落將

都天糾察大靈官

火車三五號雷公

受命三清降鬼祟

手執金鞭巡世界

身披金甲顯威靈

綠靴風帶護身形

雙目火睛耀天地

頃刻三天朝上帝 須臾九地救生靈

銀牙鳳嘴將三千 虎首貔貅兵百萬

走火行風前後衛 穿山破石捉妖精

祈晴禱雨濟世間 附體圓光通事意

治病驅邪如反掌 收瘟攝毒伏群魔

飛騰雲霧遍虛空 號令雷霆轟霹靂

三界大魔皆拱手 十方外道悉皈依

弟子祈請望來臨 大賜雷威加擁護

太乙雷聲應化天尊

安土地神咒

此間土地 神之最靈 昇天達地 出幽入冥

為吾關奏 不得留停 有功之日 名書上清

向來早堂 誦經功德 上奉高真 下保平安
賜福消災 同賴善果 證無上道 一切信禮
志心稱念 道經師寶天尊 不可思議功德

稽首皈依 無上道寶 當願眾生 常持天尊

永脫輪迴

稽首皈依 無上經寶 當願眾生 生生世世

得聞正法

稽首皈依 無上師寶 當願眾生 學最上乘

不落邪見

稽首聖眾

收經讚

誦經功德 不可思議 諸天諸地轉靈機

國運壽夭齊 大道無為 萬化樂雍熙

太上玄門早課 竟